

Jeju Na Mehkwỳ Jakrã Cunea Wỳr

MAM JOWĀW JÕ KÀHHÔC

Ýhỹ, pê Jowāw pê Jeju jarkwa na memprar catêjê nõ. Ne pê mam cupê tep pro catê, pê Jeju ihkôt ipa catê na ahna ahwỳ. Pê caku crê kam Jeju kôt ipa, ne cute amji kam hapac xà cunea na hõmpu. Ne ramã ihwej tu kam ri cutepjê cunea kam Jeju na mehkwỳ mã ihkàhhôc ita hôc, ne ihkujahêc. Na ri hõ kàhhôc ita japrỳ te **Jeju Na Mehkwỳ Jakrã Cunea Wỳr, Mam Jowāw Jõ Kàhhôc** (1 Jowāw).

Ne pom cu me mam ihkàhhôc cahyt ita kam ri cute me pamã, pahte me ampo kên ton, neahna amji to me papimxur nare, ne hirãa pê Pahpãm mã pahte ahna me amji jarên to me pamã hahkre. Ne hanea ne jũ mã me pahte me, ne me papêPahpãm tekjê na pahte me amji jahkre pej to me pamã hahkre. Ne hanea ne cute me pahkwỳ me, me pamã ajpẽn kinti to me pamã hahkre.

Jowāw te Jeju pupun na amji jarên xà

Jowāw 1.1-4

1 ¹Hàpà me ikwỳ pê Jeju na mehkwỳ, ipê Jowāw pê mam Jeju kôt me ipa catêjê atajênõ. Ne pa wa ha me amã ihhôc ne ihkujate. Ýhỹ, wa ha me amã ramã rỳ pëa mã pjê ton xwỳjrea na jũm ipa ata jarê, ne ahna ihhôc. Ne jũm ita pê me pamã pahte amji kam me pajapac xàjôr catê. Ne cupê Pahpãm te amji kam hapac xà xakat. Ne cupê me pamã Pahpãm to ipipê catê. Cwỳrjapê ri haprỳ pê “Pahpãm Jĩa Jarkwa”. Ne por jũm ata pê jũm nare, he cupê Jeju Crixto. Pê hũmrea na amji to, nepjê wỳr wrỳ, pê wa ihkôt me ipa catêjê me, meijapac jĩa to me kampa, ne me ito jĩa to ajco me hõmpu, ne mehkopĩ, ne itỳj me ijũhkra to ajco mehcupê.

²Ýhỹ, Jeju mam Pahpãm cahê na ihkrĩ, ne cupê Pahpãm Jĩa Jarkwa, ne cupê me pamã cõjkwa pĩn Pahpãm te amji kam hapac xà to ipipê catê, ne pëwa cute me cumã to ipipê na hõmpua na, wa me amãharên to mõ. Ne taa mã ri Pahpãm cahê na pahte amji to me papijapar rohnỳtti mã na me pahto. ³Ne ampo na mã wa me amã Jeju jarên to ipa to hane? Nee

mã ampo na nare. Imã me ate Jeju me Pahpãm pê Hũm me, me ajpẽn to ikwỳ nõ na meato prãmte hajỹr, pom pê wa ipê hõ ikwỳ nõ he. Ita na cu ha me pahcunea Jeju me ajpẽn kam me pahhõnco ita na me papa. ⁴Ate me ijõ kàhhôc ita cahyt ne mempar, cu ajpẽn kam me pajakrya to me pajakry prãm to, wa ite me amã ihhõc ne ihkujahêc.

Cu ha catyt kam Pahpãm jarkwa kôt me papa na, cu ha me pahhõnco tu
Epet 5.3-21; 1 Timot 2.5-6

⁵Pê Jeju me imã, ite me amã Pahpãm jarẽn xà ita to pê hahkre he:

— Amcro jàhcujrohti ita ihtỳj jũ ri me pamõr xà ata to me pamã hahkre, ne awcapàtkô kam, cu nee jũ kam me pamõr xà ata na me amji jahkre pej nare. Ita kôpit na mãPahpãm pê amcro jàhcujrohti ata pyrãac, ne ihtỳj me pahte amji kam me pajapac xà impejti to me pamã hahkre — hane. ⁶Cwỳrjapê cu ha me pahnõ te nee Pahpãm kôt papa nare, ne pahtỳj ampo kên ton to me papa na, cu ha ihhêj ne awcapàtkô kam me pahkrĩ. Cu ha awcapàtkô kam me pahkrĩ cacrô, cu ha me amji jarẽn to:

— Ipê Pahpãm jõ ikwỳ nõ, na wa cume ajpẽn kam ihõnco ita na ipa — hajỹr na, cu ha ame pahhêj xia jarê, ne nee me papê catyt kam me papa catêjê nare. ⁷Ne nee pahte me hajỹr xà nare, cu ha quêt Pahpãm cuxà, catyt kam me papa, ne harkwa kôt me pahcunea ajpẽn to me ikwỳ nõ. Hõ, cu ha me pahcunea me hane, ne pahte me hajỹr xà ita pê ihhêj rũm amcrojàhcujrohti kam me papa xà ata pyrãac, ne ma amji mã me papa xà pupu ne ihkôat, catyt kam me papa. Pê Pahpãm kra pê Jeju me pajaxà kam ty, ne caprô jaxwỳ, necaprô ata pê ihhêj rũm cõ te ampo tũmti cuhhõn pyrãac. Ne cute me pahkên atajê cuneacuhhõn par ne to hapac kêt. Cwỳrjapê ri pahte amji kam me pajapac xà cunea tetet pit.

Cu ha Pahpãm mã pahte me ampo kên ton atajê cunea na me amji jarẽn

⁸Quê ha me pahnõ te amji jarẽn to:

— Nee ite amji kam ijapac xà kên nõ hamreare — hajỹr na, quê ha ramã taa apu amji toihhêj to mõ, ne nee caxwãm pê cumã Jeju te amji kam hapac xà jahkre pej nare. ⁹Ne quêt ajteare mã ita to, cu ha me he. Cu ha Pahpãm mã me pahte ampo kên ton atajê cunea na me amji jarẽn. Ne pahte amji jarẽn xà ata kam, quê ha Pahpãm pahte me pahkênton atajê to tojnõ ne hicu, ne pahte amji kam me pajapac xà kên cunea pê ihhêj ne me pahcuhhõn pa. Ne cupêa ri catyt kam ipa catê, ne pê ramã me pamã ahna amjijarẽn xà ata, quê ha to. ¹⁰Ne pê ramã Pahpãm rỳ pêa mã me pahto hũjarẽn to hane he:

— Pjê kam mehcunea mehkrĩ itajê ihtỳj hõtpê mehkên ton to me ipa — hane. Cwỳrjapê quê ha me pahnõ te amji jarẽn to:

— Wa ite nee jũ caxuw ampo kên ton nare — hajỹr na, quê ha ramã Pahpãm mã ihhêj xi na hacjê, ne nee Pahpãm jarkwa to amji jahôt to ipa nare.

Jeju Crixto pê me pahkritxwỳ

2 ¹Me apê imã me ikra kīnti atajê pyràac. Ampo na? He ca ikôt Jeju to amji mã meahimpej, na wa ite me amã ihkàhhôc ita ton, mār ca me cahyt ne me kampa, ne nee me ampo kên ton to me apa nare. Nāmri quê ha me pahnō te ihkên xà nō tonna, quê ha Jeju pê catyt kam ipa catê ata taa to amji pytà, ne taa Hūm mã harē. Ne cumã amji jarên to:

— Jūm ata te ihkên ton xà ita jahpan xà na ihkên mã mēn nare. Ampo na? He pê wa ramã pa amji toihkritxwỳ, ne hahpan xà na ty — hane. Jeju peaj to impej, na ri ihtỳj me pahto hane. ²Jeju tyc xà ata kôt ri Pahpãm ihtỳj pahte me pahkên ton itajê jicu, ne totojnō ne to hapac kêt. Ne nee mã pahte me pahkên ton xà jahpan xà na pit mã Jeju tyc nare, ne pjê cunea kam, mehcunea te mehkên ton atajêcunea kritxwỳ na ri cute amji ton ne ihtyc.

³Cu ha pahte me Pahpãm te me pamã harkwa jirên itajê kam catyt kam me pajapac na, cu ha pahtỳj me pamã pahte Pahpãm jahkre pej na me amji jahkre pej, neihkôt me papa xà impej na, me pamã amji jahkre pej. ⁴Nāmri quê ha jūm te amji jarên to:

— Wa ramã ite Pahpãm pupun pejtu, ne imã hahkre pej, na wa itỳj ihkôt ipa — hajỳr, ne nee por cutecumã harkwa jirên xà atajê kam hapac nare na, quê ha taa ramã apu amji to ihhêjto mō, ne apu ahna amji caprỳ jarē. ⁵Ne quêt jūm te Pahpãm kam hapac pejti toipa ata mã ri caxwãm catiamã Pahpãm kīn, ne ihtỳj cumã Pahpãm me cute ajpên kam ihhônco na amji jahkre pej. ⁶Nāmri quê ha jūm te amji jarên to:

— Wa Pahpãm me ajpên kam ihônco tu — hajỳr ata, quê ha harkwa to amji japackrea ne, ne ihtỳj Jeju pêPahpãm kra te amji kam hapac xàa kôt ipa na amji to ihtỳj tu ne. Ne ihtỳjcumã Pahpãm me ajpên kam ihhônco tu na amji jahkre pej.

Cu ha me pamã ajpên kīnti to me papa to me prãm

Jowāw 13.34-35; 1 Jowāw 3.14-18

⁷Imã me ijō ikwỳ nō kīnti itajê, xà ajkī cormã wa Pahpãm te me amã harkwa jirên xà itajê na me amã ihhôc? Hãpà! He rỳ pêmã ramã pahte me ajpên kīnti xà ita na cute me pamã harkwa jirên xà ata na me gūpar.

⁸Na wa ha Jeju te amji kam hapac xàa kôt hipêr me amã harên to intuw. Ne pahte me ajpên kīn kam me pahtēm xwỳjrea na, pê mam ramã Jeju amjimã me pahkīn. Ne pom Jeju te amji mã me pahkīn ata pê ihhêj rūm pyt krã cator pêê mã hàhcujro. Ita kôpit na, pahte me ajpên kīn to me papa xàita pê ihhêj rūm ramã pyt jàpir tu jàhcujro. Na ri pahte ajpên kīnti to me papa xà ita pê ihhêj rūm, nee me pahkam awcapàtkô nare.

⁹Nāmri quê ha jūm amji jarên to:

— Pahpãm te ihhêj ne imã ite amji kam ijapac xà cujro, cwỳrjapê ri imã ampo pejcunea ton jahkre pej — hane, ne ma apu Jeju kam ajpên to mehkjêjê atajê

nõ caca, ne nee me to impej nare na, quê ha ihhêj ne cormã awcapàtkô kam apu ipa ita na. ¹⁰Ne por jũm mã Jeju kam cute ajpên toihkjê kĩnti, mã ihkĩn mea mã ipaata pê ihhêj rũm amcro jãhcujro kam ipa xà, cwýrjapê quê ha nee catyt kam ipa jicu nare. ¹¹Ne por jũm mã ihkjê kĩn nare, mã ma apu ihcaca ata pê ri ihhêj rũm awcapàtkô jãmkřã kam mŏr xà ata pyrãac. Ne cupê ihhêj rũm mento tũam, ne nee hãn ne catyt kam Pahpãm te amji kam hapac xà kŏt ipa nare.

Cu ha pjê kam amji kam me hapac xà kaj na me papa to me prãm

¹²⁻¹⁴Ihhêj rũm me apê me ikra pyrãac, na wa ite me amã ihhŏc. Ampo na? He me amã Pahpãm pê me Apãm jahkre pej. Na ri ihkra pê Jeju tyc xà atakŏt, cute me akên itajê to tojnŏ ne hıcu. Ne por ca ramã Jeju kŏt ate me apato me amji kãhtu atajê mã, wa ite hanea ne ihhŏc. Ampo na. Me amã, por pê ramã Pahpãm pjê ton xwýjrea na jũm ipa ata jahkre pej. Ne pom ca curmãJeju kŏt ate me apa kam me atêm atajê mãhanea ne ite ihhŏc. Ampo na? He ampeaj kam meatýj, ne me acaxwãm pê ihtýjPahpãm jarkwa amji to ajpa. Na ca ate amji kam me gapac xà impej to, ate mepahcurê xwýn pê Xatanaj jırŏ pê me axãm, ne me tojhê.

¹⁵⁻¹⁶Ne wa ha me amã pjê ita kam, Pahpãm curê xwýn te amji kam hapac xà me ampo cuneahapŏj itajê cawpa. Pom pjê kam ampo kên itajê nee cŏjkwa pĩn, Pahpãm pĩn hapŏj nare, ne pjê ita pĩn ri hapŏj. Ne por Pahpãm curê xwýn catêjê atajê te amji kam hapac xà incrê itajê mã he.

Cute me Pahpãmmã ampo kĩn nare atajê xen.

Ne cute me cumã ampo kên xen atajê to, cute me amji
cajpuawprãmte, ampeaj kam me cumã hãn.

Ne hanea ne quê ha ampo te mehcajpuaw ata pupu, ne me ahna
prãm pyrentu.

Ne hanea ne me cumã hàhcukrêj jãhtŏti atajê kŏtihtýj amji to me
cati prãm to me ipa.

Atajê mã ri Pahpãm kĩn nare. Na ca ha nee me apêjũmjê atajê pyrãc, ne amji mã ampo itajê na pit mã prãm to me apa nare. Ne Pahpãm ca quêt amehkĩn. Nãmri ca ha ate me amã ampo itajêpit kĩn na, quê ha nee me amã Pahpãm kĩn nare.

¹⁷Ne mêr ampo na mã wa me amã ampo itajê cawpa to hane? Nee mã ampo na nare. He quê ha jũ caxuw pjê te amji kam hapac xà itajê cunea me, Pahpãm curê xwýn te ampoxen xà itajê cunea ihkên mã axà ne hamre tu. Ne por quêt me cumã Pahpãm kĩn, mã Pahpãm mã ampo kĩnti to pit mã amji kam me hapac tome ipa atajê, quê ha quêt me ahtwý, ne amji to me ipijapar rohnýtıti mã, Pahpãm cahê na.

Cu ha nee Crixto curê xwýnti hêj xi xà kam me pajapac to me prãm nare
1 Jowãw 4.1-6; 2 Jowãw 7-11

¹⁸Me ikra, he ramã ampo cunea jamre xà na hàhtêp. Ne ramã ate me Jeju Crixto curê xwýnti ata jarên par. Ne por jũm ata pê ihhêj ne pŏ

rŭm Jeju Crixto teamji kam hapac xà kôt ipa catê, ne caxwãm pê aracri cupê Jeju curê xwÿn. Neramã Jeju curê xwÿn catêjê jãhtôa ne me hapôj, cwÿrjapê ri ramã me pamã ampo cunea jamre xà na hàhtêp to mŏr na hahkre pej. ¹⁹Ne pê mam me pahcurê xwÿn itajê pê me pahkwÿa, ne ihtÿj me pahcahê naipa. Ne hamre, ramã ma me papê cator, ne nee mã ampo na me papê cator nare. Pê pahte amji kam mepajapac xà kaj na amji kampa. Quê ha cama me cupê me pahkwÿ na mã, quê ha ita ri me pahcahê na ame ipa. Pê me papê me hapôj xà ata kôt me pahcunea te me cupê me pahkwÿ nare na me hahkre pej.

²⁰Pê Jeju Crixto me amã Pahpãm Carô Pejti gŏ, pê ca ahna me amji capa, cwÿrjapê ri me acunea mã Pahpãm te amji kam hapac xà impejti, hêj xi nare ata jahkre pej. ²¹Xà ajkí ate me Pahpãm te amji kam hapac xà impejti jahkre pej nare na mã, wa ite ahna me amã ihhŏc? Hãpã. He ramã me ate, cute amji kamhapac xà impejti kam ihhêj xi nare na, ate me hahkre pej.

²²Wa ha me amã mehhêj xi catêjê jarê. Quê ha jŭm te me amã hŭjarên to:

— He nee Jeju pê, por pê Pahpãm me pamã pahpytãr catê na Crixto to awjahkre ata nare — hajÿr na, ca ha mehhêj xi na me hahkre pej pyrentu. Ne ihtÿj Jeju meHŭm pê Pahpãm to mehhêj to me ipa, ne ma ame curê. Cwÿrjapê ri jŭm ata pê Crixto curê xwÿnti. ²³Ne por jŭm Jeju pê Pahpãm cãmter ita to ihhêj xi ata, hanea ne ihtÿj Pahpãm pê Hŭm to ihhêj xi, ne ma apu curê. Ne quêt jŭm te ihcãmter na amji caxàrata te ramã hanea ne Hŭm na amji caxàr.

²⁴Pê ca Pahpãm wÿr me apkjê, ne me kampa atakam, pê ca me Pahpãm teamji kam hapac xà cunea jahkre pej. Ne ate mehahkre pej atajêa kôt, ca ha catyt kam me apa kam me toacrà. Ita na ca ha ihcãmter me Hŭm kam me ajpên hŏnco ita na, ne me atír rohnÿtti mã, Pahpãm cahê na. ²⁵Hŏ, ampo ita to pê ihcãmter me pamã awjahkre.

²⁶Ne pom ame amã ihhêj xi prãm to me ipa itajêna, wa ite me amã ihhŏc. ²⁷Ne ramã Crixto te me amã Carô Pejti jŏr. Mã me akam Carô Pejti itakam, ca ha nee me jŭm te me amã ampo to hahkre xà atana me prãm nare. Ampo na? Carô Pejti ata ri ihtÿj me amã Pahpãm te amji kam hapac xà cunea tohahkre to ipa. Ne cute ampoto hahkre xà atajê nee mã ihhêj xi nare, ne quêt ampeaj kam ri. Cwÿrjapê ca ha Carô Pejti te me amã ampo to hahkre xà atajê na kam megapac to impeaj ne, ne ma ihkôt me hakop. Ne Crixto me ajpên kam me ahŏnco kam me to acrà.

²⁸ÿhÿ, imã me ikra kinti itajê. Quê ha ihtÿj jŭ caxuw me pajŏPahhiti pê Jeju Crixto hacpÿ ne me pahwÿr amji jaxà. Cwÿrjapê ca ha Crixto me ajpên kam me ahŏnco kam me to acrà ita na. Mã ca nee kam ame apahãm, ne ame amji mã hŭpa nare, ne atÿj cuna mã me xa.

²⁹Ne ramã me amã Crixto pê Pahpãm kra te catyt kam ampo pej pit ton to ipa na hahkre pej. Na cu ha pahte catyt kam ampo pej pit ton to

me papa na, cu ha hanea ne me papê Pahpām kra na ramã me pamã amji jahkre pej.

Cu ha pahtỳj jũ caxuw Jeju Crixto me, me ajpēan
Jowāw 1.12-13; 1 Petrô 1.13-21; 2 Petrô 3.11-14

3 ¹Pỳhàpà, he Pahpām mã me pahkían to me pahkín! Ne ihtỳj cute me pahto amji kra. Mã pjê kam me cupê Pahpām tekjê nare, ne ma ame curê atajê pê me papêihkra na me pajahkre kêatre. Ampo na? He nee me Pahpām jahkre pej nare na ri. ²Imã me ijô ikwỳ nõ kĩnti itajê, ramã me papê Pahpām kra. Ne cormã jũ caxuw me papê ihkraa to ihkra xà ata na, cormã pahte me amji jahkre pejpej nare. Ne ita ri me pamã hahkre pej he: Quê ha hacpỹ ne Jeju me pahwỳr amji jaxà, ne me pamã amji to ajpê, cu ha ajteare mã, ihnô na me hõmpu. Ne pahte me hõmpun xà ata caxuw, cu ha me amji to intuw, ne Jejume, me ajpēan. ³Ne pahte amji to me papintuw xà impejti ita jikaj xà ata kam, cu ha hahkà na amji tète pahte amji kam me pajapac xà kên cunea japôj to memô. Ne pahte amji kam me pajapac xà tetetti impejti to me amji kampa to me hanea, pom quê Jeju te amji kam hapac xà tũm nare ne ihtetetti he.

⁴Ne quê ha jũm te, cute amji kam hapac xà kam ampo kên to ihtũm na, quê ha taa ramã Pahpām jarkwa jirô pê ihpỳm, ne ihkaj na amji kampa. ⁵Ne ramã me amã Jeju te jũ caxuw ampo kên ton nare na hahkre pej. Ne taa mã pê me pahwỳr wrỳ, cute me pahcunea tète me pahkên jūrên prãmte. ⁶Na cu ha pahte Jeju kam me ajpên hõnco na, cu ha nee me pahkên ton kam me to pancrà nare. Nãmri quê ha jũm te Jeju jahkre pej nare, ne hõmpun pej nare kam, mãnea mã ihkên ton kam to incrà na, quê ha nee Jeju to amji mã ihhimpej, ne me ajpên kam ihhõnco nare.

⁷Imã me ikra kĩnti itajê, nee ca amji na me jũm jamār quê me amã ihhêj nare. Ne por jũm catyt kam Pahpām cuna mã impejti to ipa ata pê riJeju pyrãac, ne catyt kam ipa. ⁸Nãmri quê ha jũm te mãnea mã ihkên ton to ipa na, quê ha Pahpām cuna mã ihkêanre ne, ne cupê me pahcurê xwỳnti pê Xatanaj tekjê. Ampona? Pê Pahpām pjê ton pêa mã, pê Xatanaj ihkên ton kam tẽ. Cwỳrjapê ri cute Xatanaj jàpên xà cunea to hamre xà caxuw me Pahpām kra cato.

⁹Ne por me cupê Pahpām kra atajê, nee mehkên ton kam me to incrà nare. Ampo na? Me caxwãm pê Pahpām te amji kam hapac xà hàpên to ipa na ri. Ne Pahpām pê me Hũam to me Hũm ita kam, jũ mã quê ne ajte mehkên ton kam me to incrà? Jũ wỳr quê jũm hane! ¹⁰Měr me Pahpām kra, me Xatanaj kra te amjikam hapac xà to me ajpên ne me hõmpu. Por jũm nee catyt kam ipa nare ata me, cumã ihkjê kín nare atahirã pê nee cupê Pahpām kra nare, ne cupê Xatanaj kra.

Cu ha me pamã ajpên kînti to me papa to me prãm*Ruc 10.25-37; Jowāw 13.31-35*

¹¹ Imã me ijō ikwỳ nō kînti itajê, por pê wa mam me amã Pahpãm jarkwa jarê ata, wa ha hipêr me amã harên to mō:

— Cu ha me pamã ajpên kînti ne — hane. ¹² Cu ha nee me papê me panquêt xwỳ pê Cãn kêanre pê Xatanaj tekjê, ne ihtōa cura ata pyrãc nare. Ne mēr ampo na mã pê ihtō te amji to hapure ita cura? Pê ajco hapure catyt kam impejti ton to ipa, ne Cãn pê ihkînte ajco ihkêanre ton to ipa, ne ma apu ihtōre te impejti ton ita na to ihcaca, na pê ihcura.

¹³ Ýhỹ me ikjêjê, he me cupê pjê ita tekjê catêjê te ihkên ton to hajýr tũam. Ne quê ha cute me hajýr catêjê ma ame acurê, ca nee me amji mã:

— Pýhàpà, ampo na mã ame icurê? — hajýr nare. ¹⁴ Ne por me cumã mehkîn nare atajê pê ri ihhêj rûm mehtyc pyrãc, ne nee me ampo pej ton nare, nema ramã ihkên kam, cute me amji pupun xà kêanre ata wýr me pra. Ne me pa nare. Ihtýj quêt me pamã Jeju kam me cupê me pahkjêjê kîn. Cwýrjapê cu ramã me papê ihhêj rûm pahte me pahtyc xà jahpan, ne ma me pampej mã, amjikînti ata wýr me pamprar pyrãc. ¹⁵ Quê ha jũm te ma apu ihkjê curê na, quê ha ramã Pahpãm mã cupê mehcuran catê pyrãc. Ne ramã me pamã, jũm pê mehcuran catêata te nee Pahpãm cahê na ihkrí nare na, hahkre pej.

¹⁶ Jũ mã cu ha ajte me, ne me pamã ajpên kîn ita na me ajpên jahkre pej? MeJeju pupu he. Ampeaj kam cumã me pahkîn, cwýrjapê ri me pajaxà kam ihtyc. Ata pê ri me pamã ajpên kînti xà. Na cu ha me pamã me pahkjêjêkîn hanea, cu ha pahtýj mencwýrjapê me pahtyc na me amji to ihtýj tu to me papa. ¹⁷⁻¹⁸ Ne nee cu ha me pajarkwa to pit mã ame pahkjêjê kîn, ne me to impej nare. Ne me hàpên xà na cu ha me tehcajpa, ne me to impejti ne, ne ampeaj kam me pamã mehkîn. Ne quê me anō mã ampo, ca me akjêjê nō pupu quê apu ampo na prãm to mō, ca ha hõmpu ne atýj gâhcukrêj to ihtehecajpa. Nãmri ca ha ate nee me akjêjê caprĩ nare, ne nee mehtehecajpar nare ita kam, jũ mã ca ha ajte ne amji jarên to:

— Imã Pahpãm kîn — hane?

Cu ha ajpên kînti to me papa na, cu ha pahcaxwýn carĩcti kam me papa

¹⁹ Me pamã me pahkjêjê caprĩ xà ita ihtýj me papê Pahpãm hêj xi nare ata tekjê na me pajarê. Cwýrjapê cu ha Pahpãm cuna mã me paxãm xà jō amcro ata kam, cu ha nee me pahkên na me amji cãmji nare, ne quêtme pahcaxwãm pê me pahcarĩcti ne. ²⁰ Nãmri cu ha me pahcaxwãm pê me pahcarĩc nare na, cu ha cama me amji cukij to:

— Xà ajkĩ ipê Pahpãm tekjê? Nare mōrmō nee ipê hō tekjê nare — hajýr na, cu ha cormã me Pahpãm mã ampo cunea jahkre pej ata to meamji japackre. Ne hanea ne cumã me pajirōa pê me pamã pahte amji

kam me pajapac xà pupun na me hahkre pej. Ne ita jirô pê cu ha cormã cumã me pahcapriata na me to amji japackre.

²¹Imã me ijô ikwÿ nõ kinti itajê, cu ha pahte me ajpên kîn na, cu ha nee me pahcaxwãm pê amji mã ame Pahpãm cupa, ne nee ame pahpahàm nare. ²²Ne por cu ampo cunea na me cuwÿ atajê, quê haihtÿj me pamã cugõ. Ampo na? Cu pahtÿj cute me pamã harkwa jirên itajê na me kampa, ne cuteamji mã ampo kinti itajê to pit mã me hupkre cahkô to me papa. ²³Pê Pahpãm mehcunea mã harkwa hyr to hane he:

— Ikra pê Jeju Crixto to ca amji mã me ahimpej, ne hanea ne me amãa ajpên kinti ne — hane. Ne pê hanea ne me imã harkwa hyr to hanea he. ²⁴Quê ha jüm te Pahpãm te cumã harkwa jirên itajê na kam hapac to ipa na, quê ha cume ajpên hõnco tu ne, ne ajpên kam mehkri. Ne pê Pahpãm me pamãCarô Pejti gõ, cwÿrjapê ri me pamã ita jahkre pej.

Cu ha nee Jeju curê xwÿnti atajê kam me pajapac to me prãm nare

1 Texarõn 5.21-22; 1 Jowãw 2.18-26; 2 Jowãw 7-11

4 ¹Imã me ijô ikwÿ nõ kinti itajê, quê ha me hàhtõa ne me amã amji jarên to:

— Pahpãm Carô Pejti te imã amji jör, wa harkwa kôt harên to ipa — hane. Ca ha nee me kam gapac nare. Ampo na? He ramã me hàhtõa ne pjê kam amehcahküm, ne Pahpãm jarên xà kaj na ame harên to me ipa. Cwÿrjapê ca ha ma me jüm te me amã amji jarên to hajÿr ata kôpî, neihkôt me hakop, hàpên xà atajê na. ²Cu ha me kampa, quê ha cute catyt kam me amã Pahpãm jarên to:

— Pê Jeju me paxümrea na amji to, ne me pahwÿr wrÿ, ne cupê, por pê Crixto to me pahkritxwÿ na, Pahpãm me pamã awjahkre ata — hajÿr na, ca ha me kampa. Ne me amãampeaj kam cupê me amã Pahpãm jarkwa to ihcakôc catê, ne kam Pahpãm Carô Pejti na me hahkre pej pyrentu.

³Nãmri quê ha cute Jeju jarên to hajÿr nare na, ca ha ramã kam Pahpãm Carô Pejti nare na me hahkre pej, ne kam Jeju Crixto curê xwÿnti carô kên na mehahkre pej pyrentu. He pê cu ramã ampo carô kên ita te pjê wÿr ajpên mör na me harên pa, ne hamre, ramã cator ne ihtÿj apu mō.

⁴Jeju kam me apê me ikra kinti atajê, me apê Pahpãm tekjê, na ca ramã cute me Pahpãm jarên kaj na ame harên catêjê atajê jirô pême axãm, ne me tohjê. Ampo na? He me akam Pahpãm Carô Pejti ihkri ita ri, pom pjê kam me kam ampo carô kên atajê jirôa pê ihtÿj. ⁵Ne me cumã pjê kam ampo itajê jarê, mã ihtÿj me cupê pjê ita tekjê pê Pahpãm curê xwÿn catêjê mekampa. Ampo na? He pjê ita te amji kam hapac xà ri me cumã harê, mãpjê ita kam me ipa catêjê pê Pahpãmcurê xwÿn atajê ihtÿj ahna me kampa. ⁶Ne me pa nare, he quêt me papê cõjkwa pîn Pahpãm tekjê, ne cu me Pahpãm te amji kam hapac xà to pit mã me hupkre cahkô to me papa. Quê hajüm mã Pahpãm jahkre pej na, quê ha ihtÿj me pahkampa.

Nāmri quê ha cumã Pahpãm jahkre pej nare na, quê ha nee me pahkam hapac nare. Ita na cuha me Pahpãm Carō Pejti te amji kam hapac xà impejti hêj xi nare ata me, ampo carō kên te amji kam hapac xà kên te to ihcupan xà na me hahkre pej.

Cu ha Pahpãm cuxà me pamã ajpên kînti na to prãm

Jowāw 3.16-21; Roman 5.5-9

⁷Imã me ijō ikwỳ nō kînti itajê, cu ha me pamã ajpên kîn, cu ha me ajpên to impejti ne. Ampo na? Pahpãm te amji kam hapac xà ita te hajÿr pit, ne taa mã ri me pamã ajpên kînti ita na me pahtehcajpar toipa. Por jùm mã mehcunea kîn, mã me to impej ata pê ri Pahpãm kra, ne ihtÿj cumã Pahpãm te amji kam hapac xà na hahkre pej ne hahkre pejtu.

⁸Ne por jùm mã mehkin nare ata pê Pahpãm jahkre kêatre. Ampo na? Pahpãm jãhcaprĩa to hàhcaprĩ, ne cupê cumã mehkînti xà cunea xakat.

⁹Ne Pahpãm mã me pahkînti na cute me pamã amji to ipipê xà caxuw, me pamã pjê wÿr cumã ihkra pyxit peaj ata kujate, mãr cu me cute amji kam hapac xà intuwti impejti ita cwa, ne kam me pahÿr rohnÿtti mã.

¹⁰Me pamã Pahpãm kîn, ne me pajirõa pê cumã me pahkîn. Cwÿrjapê pê me pamã ihkra pê me pahkritxwÿ ata kujate, mãr quê pahte me to kên ata jahpan xà na ty, quê Pahpãm pahte me to kên xà atajê jicu.

¹¹Imã me ijō ikwỳ nō kînti atajê, he ramã Pahpãm mã me pahkînti ita kam, cu ha pahÿtÿj me pamã ajpên kînti ne. ¹²Rÿ jũ caxuw jùm te Pahpãm pupun nare cakrô, cu pahÿtÿj kam pahte me amjihônco. Mã me pahcaxwãm pê ihkrĩ, ne cumã me pahkînti na ri cute amji kôat me pahÿton, mã me pamã ajpên kînti. ¹³Ne cute me pamã Carō Pejti jör na, ca me to amji japackre. Cwÿrjapê ri pahte Pahpãm kam me ajpên hônco tu na me pamã amji jahkre pej. ¹⁴Pahpãm pê me pajō Inxũ Cati, na cu hõtpê mehcunea mã me harên to me papa to me hane he:

— Pê Pahpãm pjê wÿr ihkra kujate. Pê wa hõmpu ata temehcunea caprĩ ne mehkên catihti ata pê me hütär xàcaxuw pê pjê wÿr ihkujate — hane.

¹⁵Nāmri quê ha jùm te Jeju Crixto pê Pahpãm kra na harên na, quê ha Pahpãm jùm ata mã amji gō, ne kam ihkrĩ, quê ha hanea ne Pahpãm mã amji gō, ne kam ihkrĩ, ne ajpên kam mehhônco tu ne. ¹⁶Ne me pamã Pahpãm te me pahkînti na hahkre pej, na cu toa amji mã me pahhimpej to me papa. He Pahpãm pê me pamã ajpên kîn ton catê xakat. Ne por me cumã ajpên kîan kam mehkĩrĩ atajê ri, Pahpãm kam cute me ajpên hônco tu. ¹⁷Ne quê ha ihtÿj jũ caxuw Pahpãm te me pahcukij xà ata kam ihtÿj me pahÿto ajcokjê. Cu ha Jeju te cormã pjê kam ipa reria mã me cumã mehkîntiata cuxà, me pamã mehkînti na, cu ha neeamji mã ame hũpa, ne kam ame pahpahàm nare. ¹⁸Quê ha jùm te mehcunea caprĩ ne mehkîn to ipa na, quê ha nee jũ caxuw amji na ampo cãmji nare. Ampo na? He Pahpãm mã ampeaj kam me pahkîn, na cu ha nee amji mã ame ampo

cupa nare. Nāmri quê ha jūm māmehcunea kīn nare na, quê ha ihtỳj amji na Pahpām cāmji pyrentu, ne cumā hūpa. Ne cumā ampo cupahti ata quê ha ihkên ata mā cumê.

¹⁹Pahpām mā mam me pahkīnti, cwỳrjapê ri me pamā ihkīn. ²⁰Nāmri quê ha jūm te amji jarên to:

— Imā Pahpām kīn — hajỳr, ne cumā Jeju kam ihkjê kīn nare, mā ma apu curê, ata ri ihhêj xia to ihhêjxi. Ne jū mā quê Pahpām pupun nare kam cumā ihkīn, ne ihkjê pupun cākro, ma apu curê ne apu ihcaca? Jū wỳr quê cute hajỳr ita kam apu amji mā hamā. ²¹Pê Crixto me pamā ita na harkwa jirên to hane he:

— Por jūm mā Pahpām kīn ata mā, quê ha ihtỳj hanea ne ikam cupê ihkjê ata kīn — hane.

Cu ha me pamā Pahpām kīn na, cu ha me harkwa kampa

Roman 8.35-37; Iipên Xà 3.5

5 ¹Por quê ha jūm Jeju Crixto pê Pahpām kra, pê Hūm me pamā cupê me pahpytār catê na to awjahkre ata to jūm amji mā ihhimpej, ata pê riPahpām kra impeaj. Cu ha me pamā jūm xūmre ata kīn na, quê ha hanea ne me pamā ihkra ata kīn. ²Jīkjê na mā, quê ha me pamā Pahpām kīn, cu ha cute me pamā harkwa jirên xà atajêa na, kam me pajapac na, quê ha hanea ne ihtỳj me pamā me cupê Pahpāmkra na mehkwȳ atajê kīn. ³Xà quê pijamā me pamā Pahpām kīnti ita kam, cu nee ajte cute me pamā harkwa jirên xà itajê kam me pajapac nare? Hāpà, cu ha pahtỳj amji mā me kampa! He xà cute me pamā harkwa jirên itajê ajkī ampeajkam me pamā ihtỳj? Hāpà. ⁴⁻⁵He pom me papê Pahpām kra ita, ne cutea ri me pamā ampo cunea kam, pahte Pahpām kam me pajapac xà caxuwcarôt jōr. Ne pahte Jeju pê Pahpām kra to amji mā me pahhimpej, cwỳrjapê cu ha pahtỳj, Pahpām te me pamā carôt jōr ata kôt, pjê ita kam Pahpām curê xwỳn atajê te me amji kam me hapac xà kên cunea tohjê.

Cu ha Jeju Crixto cāmta rūm Pahpām cahê na me papa rohnỳtti mā

⁶⁻⁷Ne jū mā cu ha me, ne me Pahpām te Jeju to mehcunea pytār catê na hām xà ata na me hahkre pej? He cōjkwa kam mencre ne cute me pamāharên. Atajê pê, Jeju Pām pê Pahpām ata te cō kam ihcumrār xà ata kam ri, Jeju pê ihkra na harê. Ne pê hanea ne Jeju pê Hūm Jīa Jarkwamā iwryc ne ihtyc, ne cute caprō jaxwỳr ata te ri, cupê Pahpām kra na harên. Ne pê hanea ne Pahpām Carō Pejti hêj xi nare ata cupê Pahpām kra na harê. Ne mencre atajê pê Pahpām to Pahpām, ne ajpên kam me pyxit peaj.

⁸Ne hanea ne cormā ita kam pjê kam mencre ne me pamā Jeju pê Pahpām kra na harên to me ipa ita na. Atajê pê Pahpām Carō Pejti hêj xi nare ata, mā catytkam me pamā Jeju jarê. Ne hanea ne cō kam me

pahcumrâr xà ata ihtÿj me pamã harê. Ne hanea ne me pamã Jeju tyc na pahte me to amji japackre xà ata, ihtÿj me pamã harê. Ne harên crê itajê pipên pit, ne ajpên kam pyxit peaj.

⁹⁻¹⁰Ne quê ha jûm te me pamã ampo jarên na, cu ha pahtÿj me kampa. Ne quê ha Pahpãm te me pamã Jeju pê ihkra na harên na, cu ha pahtÿj pahte mehûmre jûjarên kam me pajapac jirôa pê me Pahpãm kampa. Ne por quê ha jûm Jeju pê Pahpãm kra na amji mã to ihhimpej ata, quê ha ramã amji caxwãm pê amji mã:

— Ampeaj kam ri Jeju pê Pahpãm kraa to Pahpãm kra — hane. Nãmri quê hajûm te Pahpãm to amji mã ihhimpej nare ata, quê ha ihtÿj Pahpãm te apu ihhêj xi na harê. Ampo na? He nee Pahpãm te Jeju pê ihkra jarên xà atato amji mã ihhimpej nare na ri. ¹¹Pê Pahpãm me pamã ihkra jarên to hane he:

— Ikra tyc xà ita cwÿrjapê, wa ha me amã cute amji kam hapac xà tuw pejti gô, ca ha ihkôat me apa, ne me atyc xà jirô pê mã icahê na me akrîrohnÿtti mã — hane. ¹²Hô, por jûm te Pahpãm kra to amji mã ihhimpej ata te ri, cute amji kam hapac xà tuw pejti pyr. Na quê ha ihtyc jirô pê, Pahpãm cahê na apu ipa rohnÿtti mã. Nãmri jûm te nee ihkra to amji mãihhimpej nare ata te nee amji mã Jeju te amji kam hapac xà tuw pejti ata pyr xà hamreare. Na quê ha ihtyc jirô pê, Pahpãm pê ampÿa mã apu ipa rohnÿtti mã. ¹³Ne me ca nare. Ca atÿj Jeju to amji mã me ahimpej, na ri ate me amji mã cute amji kam hapac xà tuw pejti ita pyr. Na ca ha me atyc jirô pê, atÿj Pahpãm cahê na me akrî rohnÿtti mã na ate me hahkre pej pejtu, na wa ite me amã ihhêc.

Cu ha Pahpãm mã me pahcakôc, quê ha ihtÿj me pahkampa

¹⁴Cwÿrjapê cu ha nee Pahpãm cuna mã hûpa kam, ahna me pajãhtât kam, cumã me pahcakôc nare, ne pahtÿj pahte ampo na me prãm xà ata na, cumã me amjicajrên. Ne ramã me pamã Pahpãm te me pahkam hapac, ne me pahtehcajpar na hahkre pej. ¹⁵Quê ha ihtÿj me pahkampa, ne me pamã pahte ahna mepajãhwÿr xà atajêa jôr na, ramã me pamã hahkre pej.

¹⁶⁻¹⁷Quê ha jûm te Jeju to amji mã ihhimpej cacrô, ihtÿj cormã ampo kên ton na, me anô te hõmpun na, ca ha atÿj Pahpãm mã ihcajren. Mãrquê Pahpãm akampa ne jûm ata tehcajpa, quê nee hipêr ihkên itajê nô ton nare, ne quêt cute amji kam hapac xà tuw pejti na ipa. Pê Pahpãm pahtecuna mã me to kên xà atajê cunea pê me pahcator na me pamã harkwa to. Mã pahte hirô pê me pahpÿm xà ata na ri ihkaj na, ne ihkêanre. Ne ampo kên pyxitata ri ihkwÿ jirôa pê ihkêanre. Na quê ha jûm te ihkên catia ata ton to hajÿr to ipana, quê ha ihtÿj jû caxuw hahpan xà na ty. Cwÿrjapê ca ha jûm te ihkên xà catia ata ton to hajÿr na, ate hõmpun na, wa ha nee ate mehcajren xàna, me amã ijûjahkre nare.

Pahpām me pahte ampo kên ton nare na me pahtehcajpa

Jowāw 17.3-6

¹⁸ Me papê Pahpām kra impeaj, na cu nee me pahnō ampo kên ton to me papa kam to pancrà nare. Ampo na? Jeju pê Pahpām kra, ne ihtỳj me pahcurê xwỳntipê me pahpytà, ne me pahto kên cupate me pajamār to ipa na, ramā pahte me hahkre pej. ¹⁹ Me pahcurê xwỳnti ita pjê cunea kam mehcunea to ihhimpej cacrô, mã ihtỳj cormā me pamā papê Pahpām tekjê na, ramā me pamā amji jahkre pej. ²⁰ Pê Jeju pê Pahpām kra cato, ne me pamā pahte amji jahkre pej krā kretigō, mār cu me Pahpām pê Pahpāam to Pahpām na me hahkre pej. Ne Jeju pê ihkra, ne cupêa ri pahte amji kam me pajapac xà tuw pejti xakat na me pamā hahkre pej. Netaa mã ri Hūm cahê na me pahkrī rohnỳtti mã na me pahto. Ne por Hūm pê Pahpāam to Pahpām ata me, cu ha ajpên kam me pahhōnco ita na.

²¹ Imā me ikra kīnti atajê, ca ha nee jū caxuw Pahpām ràn xà na pahpām cahàc krekà nō to amji mã me ahimpej nare. Hō, ijō kàhhôc ita pit. Hamre.